

欽
定
全
唐
文

欽定全唐文卷三百七十九目錄

岑勛

西京千福寺多寶佛塔感應碑

歸崇敬

請定皇太子釋奠儀注奏

東都太廟不合置木主疏

駁巨彭祖請四季郊祀天地議

辟雍議

李抱玉

讓副元帥及山南節度使表

錢起

千秋節勤政樓下觀舞馬賦

朝元閣賦

西海雙白龍見賦

蓋地圖賦

泰階六符賦

圖畫功臣賦

象環賦

豹舄賦

豹舄賦

洞庭張樂賦

潢汙賦

有序

尺波賦

晴皋鶴唳賦

欽定全唐文卷三百七十九

岑勛

勛南陽人

西京千福寺多寶佛塔感應碑

粵妙法蓮華諸佛之祕藏也多寶佛塔證經之踴現也發
明資乎十力宏建在於四依有禪師法號楚金姓程廣平
人也祖父並信著釋門慶歸法允母高氏久而無妊夜夢
諸佛覺而有娠是生龍象之徵無取熊羆之兆誕彌厥月
炳然殊相岐嶷絕於葦茹齟齬不爲童遊道樹萌芽聳豫

章之楨幹禪池畎澮涵巨海之波濤年甫七歲居然厭俗
自誓出家禮藏探經法華在手宿命潛悟如識金環總持
不遺若注瓶水九歲落髮住西京龍興寺從僧錄也進具
之年昇坐講法頓收珍藏異窮子之疾走直詣寶山無化
城而可息爾後因靜夜持誦至多寶塔品身心泊然如入
禪定忽見寶塔宛在目前釋迦分身遍滿空界行勤聖現
業淨感深悲生悟中淚下如雨遂布衣一食不出戶庭期
滿六年誓建茲塔旣而許王瓘及居士趙崇信女普意善
來稽首咸捨珍財禪師以爲輯莊嚴之因資爽塏之地利

見千福默議於心時千福有懷忍禪師忽於中夜見一水
發源龍興流注千福清澄泛灩中有方舟又見寶塔自空
而下久之乃滅卽今建塔處也寺內淨人名法相先於其
地復見燈光遠望則明近尋卽滅竊以水流開於法性舟
泛表於慈航塔現兆於有成燈明示於無盡非至德精感
其孰能與於此及禪師建言雜然歡愜負畚荷鍤于橐于
囊登登憑憑是板是築灑以香水隱以金鎚我能竭誠工
乃用壯禪師每夜於築階所懇志誦經勵精行道眾聞天
樂咸嗅異香喜歎之音聖凡相半至天寶元載創構材木

肇安相輪禪師理會佛心感通帝夢七月十三日勅內侍
趙思侶求諸寶坊驗以所夢入寺見塔禮問禪師聖夢有
孚法名惟肖其日賜錢五十萬絹千匹助建修也則知精
一之行雖先天而不違純如之心當後佛之授記昔漢明
永平之日大化初流我皇天寶之年寶塔斯建同符千古
昭有烈光於時道俗景附檀施山積庀徒度財功百其倍
矣至二載勅中使楊順景宣旨令禪師於花萼樓下迎多
寶塔額遂總僧事備法儀宸睠俯臨額書下降又賜絹百
匹聖札飛毫動雲龍之氣象天文挂塔駐日月之光輝至

四載塔事將就表請慶齋歸功帝力時僧道四部會逾萬
人有五色雲團轉塔頂眾盡瞻覩莫不崩悅大哉觀佛之
光利用賓於法王禪師謂同學曰鵬運滄溟非雲羅之可
頓心遊寂滅豈愛網之能加精進法門菩薩以自強不息
本期同行復遂宿心鑿井見泥去水不遠鑽木未熟得火
何階凡我七僧聿懷一志晝夜塔下誦持法華香烟不斷
經聲遞續炯以爲常沒身不替自三載每春秋二時集同
行大德四十九人行法華三昧尋奉恩旨許爲恒式前後
道場所感舍利凡三千七十粒至六載欲葬舍利豫嚴道

場又降一百八粒畫普賢變於筆鋒上聯得一十九粒莫
不圓體自動浮光瑩然禪師無我觀身了空求法先刺血
寫法華經一部菩薩戒一卷觀普賢行經一卷乃取舍利
三千粒盛以石函兼造自身石影跪而戴之同置塔下表
至敬也使夫舟遷夜壑無變度門劫算墨塵永垂貞範又
奉爲主上及蒼生寫妙法蓮華經一千部金字三十六部
用鎮寶塔又寫一千部散施受持靈應旣多具如本傳其
載勅內侍吳懷實賜金銅香鑪高一丈五尺奉表陳謝手
詔批云師宏濟之願感達人天莊嚴之心義成因果則法

施財施信所宜先也主上握至道之靈符受如來之法印
非禪師大慧超悟無以感於宸衷非主上至聖文明無以
鑒於誠願倬彼寶塔爲章梵宮經始之功真僧是葺克成
之業聖主斯崇爾其爲狀也則岳聳蓮披雲垂蓋偃下欵
崛以踴地上亭盈而媚空中曖曖其靜深旁赫赫以宏敞
礪礪承陛琅玕絳檻玉璫居楹銀黃拂戶重簷疊於畫拱
反宇環其壁璫坤靈巋巋以負砌天祇儼雅而翊戶或復
肩挈鷺鳥肘擲修蛇冠盤巨龍帽抱猛獸勃如戰色有顛
其容窮繪事之筆精選朝英之偈贊若乃開扃璫窺奧祕

二尊分座疑對鷲山千帙發題若觀龍藏金碧晃晃環珮
歲隄至於列三乘分八部聖徒翕習佛事森羅方寸千名
盈尺萬象大身現小廣座能卑須彌之容歛入芥子寶蓋
之狀頓覆三千昔衡岳思大禪師以法華三昧傳悟天台
智者爾乃寂寥罕契真要法不可以久廢生我禪師克嗣
其業繼明二祖相望百年夫其法華之教也開元關於一
念照圓鏡於十方指陰界爲妙門驅塵勞爲法侶聚沙能
成佛道合掌已入聖流三乘教門總而歸一八萬法藏我
爲最雄譬猶滿月麗天螢光列宿山王映海蟻垤羣峯嗟

乎三界之沈寐久矣佛以法華爲木鐸惟我禪師超然深
悟其貌也岳瀆之秀冰雪之姿果脣貝齒蓮日月面望之
厲卽之溫覩相未言而降伏之心已過半矣同行禪師抱
玉飛錫襲衡台之祕躅傳止觀之精義或名高帝選或行
密衆師共宏開示之宗盡契圓常之理門人苾芻如巖靈
悟淨真真空法濟等以定慧爲文質以戒忍爲剛柔含朴
玉之光輝等旃檀之圍繞夫發行者因因圓則福廣起因
者相相遣則慧深求無爲於有爲通解脫於文字舉事徵
理含毫強名偈曰

佛有妙法比象蓮花圓頓深入真靜無瑕慧通法界福利

恒沙直至寶所俱乘大車

其

於戲上士發行正勤緬想寶

塔思宏勝因圓階已就層覆初陳乃昭帝夢福應天人

其二

輪奐斯崇爲章靜域真僧草創聖主增飾中座眈眈飛簷

翼翼荐臻靈感歸我帝力

其三

念彼後學心滯迷封昏衢未

曉中道難逢常驚夜杙還懼真龍不有禪伯誰明大宗

其四

大海吞流崇山納壤教門稱頓慈力能廣功起聚沙德成

合掌開佛知見法爲無上

其五

情塵雖雜性海無漏定養聖

胎染生迷轂斷常起縛空色同謬蒼蒿現前餘香何嗅

其六

彤彤法宇繫我四依事該理暢玉粹金輝慧鏡無垢慈燈

照微空王可託本願同歸

其七

歸崇敬

崇敬字正禮蘇州吳郡人擢明經調四門助教天寶中舉
博通墳典科高第累遷膳部郎中大厯中爲國子司業兼
集賢學士貶饒州司馬建中時累授光祿大夫加特進檢
校戶部尚書改兵部致仕貞元十五年卒年八十八贈左
僕射諡曰宣

請定皇太子釋奠儀注奏

金史卷之五 卷三十一
準制皇太子時幸太學行齒胄之禮者伏請每至春秋國
學釋奠之時所司先奏聽進止其釋奠齒胄之禮如開元
禮或有未盡請委禮儀使更以古議詳定聞奏

東都太廟不合置木主疏

東都太廟不合置木主謹按典禮虞主用桑練主用栗重
作栗主則瘞桑主所以神無二主猶天無二日土無二王
也今東都太廟是則天皇后所建以置武氏木主中宗去
其主而存其廟蓋將以備行幸遷都之所也且殷人屢遷
前八後五前後遷都一十三度不可每都而別立神主也

議者或云東都神主已曾虔奉而禮之豈可以一朝廢之乎且虞祭則立桑主而虔祀練祭則立栗主而埋桑主豈桑主不曾虔祀而乃埋之又所闕之主不可更作作之不時恐非禮也

駁巨彭祖請四季郊祀天地議

按舊禮立春之日迎春於東郊祭青帝立夏之日迎夏於南郊祭赤帝先立秋十八日迎黃靈於中地祀黃帝秋冬各於其方黃帝於五行爲土王在四季生於火故火用事之末而祭之三季則否漢魏周隋共行此禮國家土德乘

時亦以每歲六月土王之日祀黃帝於南郊以后土配所謂合禮今彭祖請用四季祠祀多憑緯候之說且據陰陽之說事涉不經恐難行用又議祭五人帝不稱臣云太昊五帝人帝也於國家卽爲前後之禮無君臣之義若於人帝而稱臣則於天帝復何稱也議者或云五人帝列於月令分配五時則五神五音五祀五蟲五臭五穀皆備以備其時之色數非謂別有尊崇也

辟雍議

禮記王制曰天子學曰辟雍又五經通義云辟雍養老教

學之所也以形制言之雍壅也辟壁也壅水環之圓如壁形以義理言之辟明也雍和也言以禮樂明和天下禮記亦謂之澤宮射義云天子將祭必先習射於澤宮故前代文士亦呼云璧池亦曰璧沼亦謂之學省後漢光武立明堂辟雍靈臺謂之三雍宮至明帝躬行養老於其中晉武帝亦作明堂辟雍靈臺親臨辟雍行鄉飲酒之禮又別立國子學以殊士庶永嘉南遷唯有國子學不立辟雍北齊立國子寺隋初亦然至煬帝大業十三年改爲國子監今國家富有四海聲明文物之盛唯辟雍獨闕伏請改國子

監爲辟雍省又祭酒之名非學官所宜按周禮師氏掌以
美詔王教國子請改祭酒爲太師氏位正三品又司業者
義在禮記云樂正司業正長也言樂官之長司主此業爾
雅云大板謂之業按詩周頌設業設簋崇牙樹羽則業是
懸鐘磬之拘簏也今太學既不教樂於義則無所取請改
司業一爲左師一爲右師位正四品上又五經六籍古先
哲王致理之式也國家創業制取賢之法立明經發微言
於衆學釋回增美選賢與能自艱難已來取人頗易考試
不求其文義及第先取於帖經遂使專門業廢請益無從

師資禮虧傳受義絕今請以禮記左傳爲大經周禮儀禮
毛詩爲中經尚書周易爲小經各置博士一員其公羊穀
梁文疏旣少請共準一中經通置博士一員所擇博士兼
通孝經論語依憑章疏講解分明注引旁通問十得九兼
德行純潔文詞雅正儀刑規範可爲師表者令四品以上
各舉所知在外者給驛年七十以上者蒲輪其國子太學
四門三館各立五經博士品秩上下生徒之數各有差其
舊博士助教直講經及直律館算館助教請皆罷省其教
授之法學生至監謁同業師其所執贄脯修一束清酒一

壺衫布一段其色隨師所服師出中門延入與坐割修斟酒三爵而止乃發篋出經摳衣前請師爲依經辦理畧舉一隅然後就室每朝晡二時請益師亦二時居講堂說釋道義發明大體兼教以文行忠信之道示以孝悌睦友之義旬省月試時考歲貢以生徒及第多少爲博士考課上下其有不率教者則撻楚扑之國子之不率教者則申禮部移爲太學生太學之不變者移之四門四門之不變者歸本州之學州學之不變者復本役終身不齒雖率教九年而學不成者亦歸之州學其禮部考試之法請無帖經

但於所習經中問大義二十得十八爲通兼論語孝經各問十得八兼讀所問文注義疏必令通熟者爲一通又於本經問時務策三道通二爲及第其中有孝行聞於鄉閭者舉解具言於習業之下省試之日觀其所實義少兩道亦請兼收其天下鄉貢亦如之習業考試並以明經爲名得第者授官之資與進士同若此則教義日深而禮讓興禮讓興則強不犯弱眾不暴寡此由太學中來者也

李抱玉

抱玉本安興貴曾孫世居河西始名重璋乾元初李光弼

引爲裨校天寶末元宗以戰河西有功改今名至德二載
上言恥與逆臣共宗詔賜姓李徙居京兆進右羽林大將
軍攝御史中丞陳鄭穎毫節度使佐李光弼破史思明功
第一封藥城縣公代宗立以功授兵部尚書武威郡王懇
辭王爵徙涼國公進司徒廣德中以尚書左僕射同中書
門下平章事河西隴右副元帥大厯中加山南西道副元
帥兼節度使十二年卒贈太保諡昭武

讓副元帥及山南節度使表

臣志誠有涯寄任過分嘗懼覆敗自貽譴責且授其旄節

扞彼蕃戎所掌之兵須自訓練如臂使指若網在綱則人有固心前無彊敵今以臣守在西鄙兼統漢中撫循實難威令不及況自隴坻達於扶文綿亘邊陲二千餘里雖山谷險阻足爲藩蔽其中賊路不一皆要防虞加之夷狄無厭憑陵滋甚去年旣侵右地復擾西山倘至前秋兩道俱下臣若固其汧隴則不救梁岷若進兵扶文恐患逼關輔首尾不應進退無從伏惟陛下居安慮危圖難於易其前件使及梁州刺史伏請別擇能者悉以委之令臣西備隴關竭其誠節國家大計敢不上陳

錢起

起吳興人天寶十年進士釋褐祕書省校書郎大厯中官
司勳員外郎司封郎中終考功郎中

千秋節勤政樓下觀舞馬賦

以態有餘妍貌
無停趣爲韻

惟大唐之握乾符聲諧六律化廣三無能使乘黃服阜龍
馬負圖必將登高率舞豈獨載馳載驅歲八月也一聖之
生千秋之首舉天慶丹陵之會率土獻南山之壽上乃御
層軒臨九有張葛天氏之樂醉陶唐氏之酒感百獸之來
儀卽八駿之孔阜於是陳金石儼簪裾廣場天近彩仗晴

初有馱有驕有驛有魚雲聚日下花明露餘帝曰司僕舞
我騏驎可以敷張皇樂可以啟迪歡趣須臾金鼓奏玉管
傳忽兮龍踞愕爾鴻翻頓纓而電落朱鬣驤首而星流白
顛動容合雅度曲遺妍盡庶能於意外期一顧於君前噴
玉生風呈奇變態雖燕王市駿骨貳師馳絕塞豈比夫舞
皇衢娛聖代表吾君之善貸向使垂耳長坂翹足遠垌天
驥之才莫用鹽車之役不停安得播天樂輝皇靈服御惟
允簫韶是聽則知絕羣稱德殊藝逸貌足之舞之莫匪聖
人之教則陳力者願驅策而是效

朝元閣賦

以高抗山頂升
覽清遠爲韻

上將恢帝宇壯神皋斷景山之松用而有節感子來之眾
役不告勞成仙閣之宏敞配紫極之崇高先是徵規模宏
大壯經始聖迹責成梓匠當桂戶而八水悠遠植玉階而
千巖相抗升陽烏於赤霄之表棲玉兔於翠微之上可以
吞貝闕壓崑閩盛矣哉亦神明之化也不可得而稱狀觀
乎儉以示德高卽因山虹梁天近丹陛雲還漢武求仙望
蓬萊於海上吾君有道致方士於人間厥構旣崇其寧惟
永正色深沈於木末浮光嶙亂於山頂如翬斯飛獨出於

頗農務暇霜氣澄天門闢龍輅升俯人烟於萬井小雲樹
於五陵天臨宇宙日照黎蒸是時也靈仙響集品物交感
因高載著於人風有象寧遺於睿覽聖人垂化稽古上清
彼會昌之構宇得朝元之美名不奪穡地知庶心胥悅高
標靈阜表聖壽長亨襟懷動植指掌寰瀛將九圍載廣與
三光克明斯乃棟宇之大也雖前史莫之與京夫如是古
之濬城隍飭官苑孰比我君居高而致遠

西海雙白龍見賦

以天下安樂龍
見于海爲韻

唐六葉嘉祉降皇威宣師出以律將有事於金天赫矣神

武感通上元雙龍呈瑞一色皎然惟白也昭素秋誕聖惟
龍也主殺氣清邊不爾者寧出乎海不躍於泉穆乎白龍
之爲物也潛依水德利用天下精異冥通騰驤神假苟非
君行其道物有其官則鬱湮不育潢汙而蟠隱見罔知其
旨窅冥孰見其端故我君宣八風之惠化澄四海之波瀾
覆幬斯極生靈以安惟此上瑞灼然可觀其始見也精光
晶耀溟漲清廓曳冰雪於半空晏雷霆於萬壑若長雲帶
水而不散雙劍倚天而中落忽虹立而電迴其儀不可彌
度表其祥同乘黃之偶運處其度掩嘉魚之有樂偉夫鱗

介之族莫智於龍苟靈應無兆豈休明再逢昔軒以負圖
爲景福舜以入壇爲神變殊旨同歸千載一見是以天祚
明德幽贊貞符彼二龍之萃止合一聖之有孚皓爾其真
異葉公之藻繪超然將舉同正禮之友于是時也西戎駭
目莫不感化而風趨夫如是則在宥之理足徵無疆之休
可待洋洋歌頌日聞於四海者也

蓋地圖賦

以聖德感通靈
仙降獻爲韻

有虞氏提地釐享天命光啟九有緝熙八政能使坤德以
寧祥符錫慶神矣王母通靈感聖獻爾寶圖昌爾金鏡嗣

堯之美於斯爲盛固知冥貺有則休明無極非天私我有
虞惟神歸於至德必將永其厯數寧惟錫彼封域俾皇鑒
之昭昭豈神明之默默諒可耀寰宇盛邦國蓋地如何匪
茲不克懿此圖籙實昭應感廣豎亥之遐步資重華之睿
覽規方遠近微妙元通致蠻貊於度內出山川於卷中可
以明四目達四聰易曰不出戶知天下何莫假此神功徒
稽其囊括也吞八極盡四溟霜露所墜日月所經莫不總
天目入帝庭嗤秦政得燕圖以拓境小穆公夢鷄首以稱
靈亦有周王御天漢君求仙窮人力於宇宙遍轍迹於山

川孰與夫高居深視探微洞元得地理於冥契擁神休以
永年則知明德在茲景福是降播頌聲以洋溢洎寰海與
里巷美矣哉歷選列辟符瑞鉅萬雖元珪告成白環入獻
曷若斯圖之用也九土宏而庶績建

泰階六符賦

以元亨利
貞爲韻

考星象之躔次探瑞氣之奧源得泰階於前史總六符以
爲言旣出沒以候君德有熒煌以麗乾元元德升聞慶一
人而祥發白雲夜卷映九霄而色繁爾其祥德而發觀瑞
而明德正則正俗平則平何君王之播理俾品物以咸亨

股肱掩於稷契輔翼賢於阿衡人迹其卑憑至誠而上感
天象守默因列宿而下呈配兩曜以齊美非眾宿之敢爭
豈比夫聚彼德星頴上賢人所感託於箕尾巖閒傳說之
精而已哉故符之燦兮有明義符之爛兮有深意其形昭
晰其理奧祕朝發於天而應於地向夜月而滅沒拂曙光
而蒼翠上通其象分三台而爲六下應於人感一德之不
二皆英主之所有匪常君之能致原其所出將表上帝之
心考其所歸實惟天子之利爾其臨大國懸太清德之所
感符乃無情旣依高以託質亦以數而爲名與物無競避

太陽之光色相時而作表明王之利貞火映元天似燭龍之銜吐珠沈漢水無巨蚌之虧盈豈光輝之足異亦感應之可驚忝觀光於上國仰霄漢以屏營

圖畫功臣賦

以立定爾功惟克永代爲韻

先帝之革隋也應歸運而大義舉獲仁人而鴻業集及乎計伐錄功日不暇給寶玉不足以勸賞故茅土是封鐘鼎不足以昭宣故圖贊是緝傳厥象於繪事壯崇臺於天邑貌武之臣忽被雲而鶚視股肱之任乃捧日而山立何惟肖而斯在皆凜然而可挹初庶賢遇聖神器未定天有彗

今厯象昏雲從龍兮川谷應帝曰隋失厥御國將頽弛人
心如煖王室如燬膺圖受籙明徵在予保大定功克成伊
爾由是十亂輔主三傑制戎敢揚休命克贊聖功埽乾坤
之慘黷濟品物之屯蒙闢天關而七曜再朗迴地軸而萬
寓來同暨王道清夷乃念茲而在茲旣艱難是毗亦四方
是維享其勲力嘉彼令德懿我武之雄成賴爾謀之剛克
宜其藏勲庸於盟府圖冠劔於紫極則是繪也其麗不億
倬哉羣彥丹青彪炳列盛服之暉華儼高居之祕靜斜月
在壁疑假寐以將朝頽陽半軒同處陰而休影胡像設之

既固將山河而惟永則知我唐大賚光掩前載功高賜履
追呂望於周年鳥盡藏弓異韓信於漢代盛矣哉容貌方
崇光靈不昧

象環賦

以謙德無事
循轉爲韻

聖有制作人具爾瞻是環也用之撝謙成乎其規故有典
有則全乎其素故匪彫匪刻動法天旋溫如玉色可以觀
象見意可以取文昭德終日佩之其儀不忒懿夫圖通既
固雅麗且殊皓質中澈騰光外敷守其明也處暗室而不
昧偕其道也映素服而如無鄙南容之圭貞而猶玷噉卞

氏之璧瑾而不瑜升諸組綬不亦宜乎或有黃雀酬恩鄭
商所利其名則一其實則異皆浮俗之所珍乃老氏之遐
棄寧若斯爲美也將君子而比義文而不華垂之如墜循
環無極參日月之在躬佩服有常於韋弦而戒事固知宣
尼之旨有要有倫於此表禮創物乃將卑服謙身是以成
形而不受其彩散璞而不失其真瑩爾情性潔白惟純導
爾情性貞明日新捨之則禮容若缺用之則法度是循物
旣合權古稱其善常虛心以隨運雖匪石而可轉覩妙用
之昭宣知前哲之舒卷

豹舄賦

以兩通用
四聲爲韻

麗哉豹舄文彩彬彬豹則雕虎齊價舄與君子同身故得
飛聲入楚見賜留秦曩者胡爲隱霧而不下今復何幸對
雪而迎賓蓋因虞者之獲成於匠者之手苟當時以爲用
雖殺身而何有於以履之美且無度旣居下以禦濕亦迎
前而啟路花映香塵先生玉步借使登朝廷列臺閣規矩
不改會同自若投其跡必陟鴛鴦之行取其文不改犬羊
之鄴詩人歌其事春秋美其名舍則止用則行拂漢齊飛
遙分鄴令之術入朝曳響近雜尚書之聲彼糾糾葛屨珊

珊瑚履一則固窮一則僭起制度首出憲章俱美嘗試殫
論其茲鳥而已士或覽之而言曰象以齒而焚龜以骨而
斃況之豹也憑巖穴以逞欲以爪牙而自衛而有用於人
竟以皮而戾一朝寢處成此新偉夫斑文散渙毳毛蒙密
映鶴氅以凝暉臨翠被以曜質於斯時也不可談悉亦有
刻意未參卑秩東郭之曳履長穿王生之結韞何日思蔚
然而一變歌豹舄以自畢

豹舄賦

以兩遍用
四聲爲韻

豹何爲兮鬱矣其文材賈害兮用之楚君用之則那爲舄

几几雖工與其飾亦天鍾厥美奢以則之衆目所視異哉
惟雜爾巧有詭其制也青蔥掩其真赤纁慙其麗動容而
彩射金屋舉趾而聲傳玉砌諒服玩之惟奇知侈靡之無
藝徵夫至理也匪威儀不忒匪古訓是則甚葛屨之失禮
同鷖冠之敗德何役智以宣驕乃自躬而刑國噫先王立
極念茲在茲服有常度行無越思何爾舄之豹飾雜珠綺
與文狸若昭其泰無乃簡彝是舄也君子歎之觀乎異狀
斑然復周盛霞起煥爾文質當其踐履知我者謂我惡居
下流不知我者謂我親承玉趾則知物有所歸天之冥數

惟豹作舄殺身思遇惜其有美而來亦以禦寒之故雖雨雪而盈尺俾陽和而在步不然者寧踐於斯路客有感而言其文也何麗其用也何薄當思步武之間徒異犬羊之鞞飾被已慙於翡翠爲裘更羨於狐貉別南山之霧以奉進趨同鄴縣之鳧願翔寥廓

洞庭張樂賦

以八音克諧天地充滿爲韻

洋洋乎軒轅之作也陶元化以發生運神武之不殺張至樂之淳備播皇風之塊圪舉端於素得太始之自然克成於和蕩生靈之天札何必管聲爲五羽數惟八然後合夫

大夏請言斯樂也不振而其聽博不眩而其意深大而不
振樂而不淫將使儉者得中和之紀奢者已醉飽之心君
子曰是樂也不朽之德音於是一僨一起于彼南國真聲
暢和氣塞其靜也洞庭安波其清也楚山霽色百蠻以之
神化六狄由斯仰德是樂也乃不朽之德音於是柔克可
以上享天心可以蕃屏人則知武也美而未盡濩矣猶有
慙德觀其妙矣則天地盛而氣不乖陰陽感而六律諧惟
精惟一啻萬舞之奕奕無荒無怠見鐘鼓之喈喈觀其皦
矣則合於自然施之無邊揮綽發越行流散遷事高太古

功儷鈞天其曲直其音至飾諸喜以平諸心極乎天而蟠
乎地率是樂也何享而不利原夫樂之契道也在心而心
正在聽而聽聰故至人定和而守一合愛而流通必以濟
刑政之理行山川之風豈徒耳目是翫情性克充而已哉
當是時也太虛過雲寒谷生暖三光昭晰八極充滿何淳
風之泱泱諒千古之纂纂吹伶倫之律惜彼時移繼炎氏
之頌媿茲才短

潢汙賦

有序

潢汙水之微也汲引之際人皆舍諸惟有德者知之薦鬼

神以昭忠信則百川雖廣莫逮其用焉喻士先沈後升一作
伸於知己也辭云

潢汙之水天實降之雲散雨絕淵然在茲胡稟柔而成性
能處下以任時善乎濁而徐清貯之將綠棄捐池沼之外
隱翳林泉之曲接九派而何勞方一勺之自足至若雲霄
地表霞開水陰乾天可鑒物象是臨山曉映而色近雲高
淨而影深險阻不行芥舟寧覆盈滿知節鴻毛匪沈產蘋
蘩同南澗之有藻聚飛動異舊井之無禽斯其善利也乃
至人之用心且夫出山者泉歸海者川汲引無絕隄防在

焉彼苞蕭屢浸束楚不傳惟潢汙也獨此晏然其明若昧
其壅若退竭而自中盈不侵外天資其潔德維貫神明人
棄爾微道不行猷澮夫事有小而可廣運有塞而必通當
休明之聖代徵洄酌之古風彼湛然以虛淨盍薦之於王
公俾爾忠信昭明有融俾爾嘗祀景福延洪斯則椒漿與
桂酒可以比美而同功

尺波賦

以水澹幽色風
初起波爲韻

激濫駭水齋淪始波引分寸之餘方從一勺激尋常之內
無爽盈科勢將全涌迹異盤渦感跬步以無數蕩分陰而

自多觀其日色遙臨風生未已圓規可驗疑沈壁之舊痕
前後相侔若浮書而競起跡疊相近萍縈有餘促漣漪之
散漫擁跳沫以虛徐流脈中移類蠖影求伸之際浮光上
透若雪花呈瑞之初湧以回回馳乎澹澹始羣分而下瀨
將積少以習坎生而有準動必若浮如投石以花散等覆
杯而迹幽影不過於布指光遽溢乎寸眸洵安翔似欲
將乎斗注汨汨增繞如潛運以環周無驚川后未發陽侯
當澹以成之寧同瀑怒謂小爲貴也爰進涓流淺漾風光
輕蟠水力寸長所及知文在其中方折是回見動不過則

散或往之浮彩轉初盈之淨色將潛甯戚之鯉半未能容
若流張協之薪重而纔得汾溫若沖溶滴相通未合流於
曲岸方鼎沸於分風礪石愈感淪池不融是將寬其泓量
誠有重於泉蒙濩也如委淪然可視茲延袤以上騰匪徒
旋於中沚翠激交映璿源共紀將不退於大成固在乎有
便於風水

晴皋鶴唳賦

以警露清野高
飛唳天爲韻

迴野遠色寒空繁聲眺莫媚於雨霽聆何長於鶴鳴孤飛
而天宇澄曠獨立而霜皋砥平對明景之逾秀遡晨風而

自清炯爾體空冷然響遞疑磬發而珮搖若霜標而雪麗
林鷗之皓色難比雲雁之清音罕繼雖居下而在幽亦高
聞而遠映或引或罷以遊以遨顧塵寰而不雜仰天路而
飛高懿夫秉心清迥稟質貞素偶影思侶矜容舉步忘機
遂性豈思寵於乘軒遠害全軀每勞心於警露聽閒兮易
感聲怨兮難度非陸氏之無聞想王生之可慕原其翔集
元圃騰騫翠微睨蓬壺而易感冒江海而懸飛情慕必止
心徂匪違或羣翔而反顧或孤賞而忘歸厭仙府而舉華
亭思鳴皋而適綠野爰捧日以遐鶩遂凌烟而獨下晴皋

欽定全唐文

卷三百五十九

錢起

三

曙兮邈矣靜皓鶴鳴兮杳何永俄度曲於澗瀨乍迷影於
雲景聞幽而音響清越觀麗而羽儀閒整何霽野之無人
獨仙禽之虛警

欽定全唐文卷三百八十目錄

元結 一

說楚何荒王賦 上

說楚何惑王賦 中

說楚何惛王賦 下

大唐中興頌 并序

虎蛇頌 有序

問進士

賀廣德二年大赦表

賀永泰改元大赦表

辭監察御史表

請節度使表

乞免官歸養表

讓容州表

再讓容州表

謝上表

再謝上表

爲董江夏自陳表

爲呂荆南謝病表

欽定全唐文卷三百八十

元結

結河南人天寶十三載進士擢右金吾兵曹參軍攝監察御史爲山南西道節度參謀以討史思明功遷監察御史裏行進水部員外郎代宗立拜道州刺史進容管經畧使加左金吾衛將軍卒年五十贈禮部侍郎

說楚何荒王賦

上

梁寵王召君史問曰史之記事無有遺乎對曰有之臣楚人也請說楚人之遺事昔聞臣何荒王使釣翁相水相置

欽定全唐文

卷三百八十

元結

浮宮之所相用眾釣之處翁曰臣相水多矣不能悉說請說湘江之流有礪有瀧其至險也實迴山如鬪敵壁若合陽崖陰壑景氣常雜崩流激聲空響相答則有峒峒峻束噴噴觸沃衝回繁漩圯崖開谷故眾聲相喧積氣相昏齟闕深沈出入千里常如凝陰是以魚經其中皆鬣禿鱗脫眄腮嚙煦忽爲淵流瀛瀛油油蘊淳無聲島嶼若浮則有厭波濤湍險之苦者必於其間養鱗讓鬣休游施舒如此之處皆曰魚都君王審之無易此乎荒王眺歎曰釣翁阜父其思隘歟乃欲置吾於湘水一曲釣羅病魚吾自相水

洞庭可矣於是命造眾釣於是命造浮宮令眾釣所至淵
無藏龍令浮宮所狀與仙府比同宮有天舩龍殿當居史
端實靈巫鬼祝女司宮侍何荒王而公族國卿莫得至焉
宮有艚臺揭拔類擬天都薰珍鈿塗纓佩垂紆金珠玉爐
蕭渺清泠苾馥芬敷臣何荒王於此臺上與姪女嫫姝雙
歌閑徐娛然自娛宮有絳堂艚房舩館艚廊載戲兒奴妓
官諧奴內臣官姥優倡及翫器不名咸維宮傍宮有聯艚
負土以爲艚囿囿多天草媚木淫禽醜獸宮有海舩之闕
仡偃解懸左曰瑞風右曰祥煙宮有四門青氣白雲丹景

元寒然後始爲鷁城匝宮屯備交戰禁御忒羅攢峙其餘
駭鯨之艤飛龍之舫鳧艫鶴舳羅宮上下者千里相望浮
宮可御而眾釣無成臣何荒王乃浮浮宮於都龍之漩冷
出洞庭之南漢將觀蠻師夷人與漁者試眾釣於沅湘會
泥臣何荒王始見積魚之山而喜色未起及見眾猶畜委
釣未施已滌洄淵洑周袤千里眾中之魚皆觸感鍛駭投
跳委壘可以薦車臣何荒王輦於其上而心始喜是日置
魚監拜網尉釣尹司綸各有等次又有類龍學鯉肘釣脍
鈎鵬騰鶚躍潛深錯捺得怪魚狀龍者皆差授官爵寵王

聞之喜曰吾國無有長流激湍平湘大淵而不知有此樂也始知城池宮館爲拘我之邸山澤鷹犬爲勞我之方當誦記所聞歸學而主君史証曰不然須臣言已或可聽焉臣聞浮宮之成也臣何荒王令羣臣有後爲浮司不爲浮茅者族百姓能率爲浮家共爲浮鄉者復男子能湍游上下者爲王賓女子能淵居移日者爲王嬪未及一年遂變楚俗川原有楚室之鄉江湖有駢舟之曲家見湍上之悲戶聞臨淵之哭時野有歎曰嗚呼有國者非喜愛亡國有家者非喜愛亡家當取其亡也如喜愛者耶今君上喜愛

浮宮眾釣令臣下喜愛浮司浮鄉吾恐君臣各迷而家國
共亡此實楚正士歎臣何荒王臣願君王驚懼爲心指此
爲箴

說楚何惑王賦

中

寵王睎然復問君史曰更有記乎曰有之甚妖怪也何故
不說寵王曰當必爲吾說之對曰臣聞天鄙有山山有玉
鼓實有天颺扣之歌舞聲媚金石韻便宮羽寵王曰生休
矣吾將購之君史証曰不可臣所不欲說者懼君王好之
君誠不忘歟臣請備說其可好乎昔臣何惑王用閹嬖之

謀肆極荒淫更經年歲鑿險填深轉餽通千里萬金五譯
臣妾借喻其心然後云獲非嬖女撫鼓而天醜不舞非嬖
女引和而天醜不歌天醜舞一容化一分眇一祥褻一宛
袂臣何惑王見之舒舒曳曳若多醇酎而不知所制天醜
歌一化顏一主顧一更聲一換氣臣何惑王聽之娛娛懿
懿若已酣昏而不知所至天醜歌舞臣何惑王氣如陽春
始霽時雨天醜不歌舞臣何惑王心若已喪而頽壞不主
嗚呼天醜惑人至此嗚呼天醜媚人至斯如有醜額牲牲
輔之使臣何惑王之心無所不欲使臣何惑王之意無所

不爲獨言選女於餘可知其選女也豈止嬖嬗媼嫗及嬖
未笄將齧將齟將嬖將嬖將嬖可喜美者母姨負抱姑姊引提
詣於王宮字籍王閨然後割楚國廟右爲天醜作宮分楚
國社陽爲醜顓作館悉楚國之好奉之已窮於所奉之心
其猶未滿楚國之人已悲咨冤怨日苦其毒其臣何惑王
尚熙懷敷娛日思未足野有直士觸而証曰大王溺於天
醜惑於醜顓不顧宗廟遂亡人民如何下命其令且云舞
者能變一度歌者能變一聲應醜樂之節數充寡人之性
情且能富其親族又能貴其父兄至於母姨姑姊皆能與

之封邑以爲世榮令行逾月楚俗皆化女忘蠶織男忘耕
稼里開學歌之館鄉築教舞之榭遂使黃鐘大呂生溺惑
之聲孤竹空桑起怨離之調變風俗於一歡忘正始於一
笑大王未覺遂不節損此所謂鑿顛覆之源造亂亡之本
今之所好則妖惡之物所爲又怪醜之事義軒之耳必不
肯聽堯禹之心必不肯喜臣何惑王悟之於是使嬖臣挾
玉鼓與醜樂使閹尹抱天靈醜額鎖以金索繫於石人沈
之深淵飛檝而旋

說楚何惛王賦

下

寵王曰殆哉楚國幾爲浮宮醜樂所亡君史曰幾亡楚國
有甚於是昔臣何愾王極暴極虐使臣下得肆姦肆佞肆
兇肆惡臣何愾王不知如此亡可待矣而乃歎曰於戲堯
實皐帝禹實隸王殷周君長并夫可方焉有慘然勞苦而
爲人主焉有隘然九州而裂封諸侯吾必合外荒夷狄海
內人民悉奉我爲主欲世世臣臣此臣何愾王所云又謀
變先王之典禮更萬物之名號列宮官於海外窮天地而
徧到而復思稽極變化徵驗怪異盡難得之物充無窮之
意荒娛厭怠思計所爲度國土之不大料財力之不支乃

令人曰吾欲勞汝人民休汝人民汝人民豈知今悉汝丁壯婦人繼之童翁分力負載而隨我已老謀我已名師人民聽我當無二思所舉旣甚所資不足乃署官而賈鉗孤而鬻始令國中絕人謗讟贊謀者侯敢諫者族其令朝行其俗暮改有以逃罪正言不發萬口如封諂媚相與于顏一容野有忠臣負符矯謁僞爲齊客給而証曰臣入君王之封域見君王之風化踟蹰路隅不覺泣下或聞哀號或聞悲呼訊於閭里必鰥寡惻孤或見凶侈或見驕奢訊於左右必公侯之家客說未已臣何惜王曰然乎謂何對曰

噫君王不知忠正不植姦佞駢生能焞殆仁惠冒蓋聰明
令巧媚得口爲矛戟令姦凶得心爲甲兵此皆明跡甚於
鬼神發機有若雷霆實畏君王已芻於牢圉實恐君王已
暴夫乾枯君王如何不是念乎臣恐楚國化爲荒野臣恐
君臣不如犬馬臣何惜王於是眄容而慚撫身而哀仰爲
客曰君幸憐之得無戒哉君爲臣化心心化身身化化人
嗚呼遞化之道在制於内外外之入也有視聽言聞內之
出也有性情嗜慾出入相應必有禍福臣何惜王聞之讌
居化心諷誦斯言終身爲箴遂罷已成之事寢未成之謀

廢所賈之官復所鬻之孤敢諫者侯贊謀者誅君史言已
王客捧酒爲寵王壽起而贊曰君史說楚似欲戒梁敢願
君王示鑒不忘

大唐中興頌

并序

天寶十四載安祿山陷洛陽明年陷長安天子幸蜀太子
卽位於靈武明年皇帝移軍鳳翔其年復兩京上皇還京
師於戲前代帝王有盛德大業者必見於歌頌若今歌頌
大業刻之金石非老於文學其誰宜爲頌曰

噫嘻前朝孽臣姦驕爲昏爲妖邊將騁兵毒亂國經羣生

失寧大駕南巡百僚竄身奉賊稱臣天將昌唐繫曉我皇
匹馬北方獨立一呼千麾萬旗戎卒前驅我師其東儲皇
撫戎蕩攘羣兇復服指期曾不踰時有國無之事有至難
宗廟再安二聖重歡地關天開蠲除祆災瑞慶大來兇徒
逆儔涵濡天休死生堪羞功勞位尊忠烈名存澤流子孫
盛德之興山高日昇萬福是膺能令大君聲容沄沄不在
斯文湘江東西中直浯溪石崖天齊可磨可鐫刊此頌焉
何千萬年

虎蛇頌

有序

猗玗子逃亂在碓南人云猗玗洞中是王

一作三下同

虎之宮

中碓之陰是均蛇之林居之三月始知王虎如古君子始知均蛇如古賢士然哉猗玗子奪其宮王虎去而不回猗玗子侵其林均蛇去而不歸借順惠讓可作頌矣

虎頌

猗王虎將何與方方古太王非不方於今今也惠讓不如王虎之心

蛇頌

猗均蛇將何與儔儔古延州非不儔於時時也順讓不如

均蛇之爲

問進士

永泰二年
通州問

第一

問天下興兵今十二年矣殺傷勞辱人似未厭控強兵據
要害者外以奉王命爲辭內實理車甲招賓客樹爪牙國
家亦因其所利大者王而相之亞者公侯尚不滿望今欲
散其士卒使歸鄉里收其器械納之王府隨其才分與之
祿位欲臨之以威武則力未能制欲責之以辭讓則其心
未喻若捨而不問則未覩太平秀才通明古今才識傑異

天下之兵須解蒼生須致仁壽其策安出于其昌言

第二

問往年天下太平仕者非累資序積勞考二十許年不離一尉至於入廊廟總樞轄則當時名聲籍甚者得至焉今商賈賤類臺隸下品數月之間大者上汙卿監小者下辱州縣至於廊廟不無雜人如專經以求進主文而望達者若不困頓於林野則必悽惶於道路今日國家行何道得九流鑑清作何法得僥倖路絕施何令使人自知恥設何教使賢愚自分

第三

問開元天寶之中耕者益力四海之內高山絕壑耒耜亦
滿人家糧儲皆及數歲太倉委積陳腐不可校量忽遇凶
年穀猶耗盡當今三河膏壤淮泗沃野皆荆棘已老則耕
可知太倉空虚雀鼠猶餓至於百姓朝暮不足而諸道聚
兵百有餘萬遭歲不稔將何爲謀今欲勸人耕種則喪亡
之後人自貧苦寒餒不救豈有生資今欲罷兵息戍則又
寇盜猶在尚須防遏使國家用何策得人安俗阜不戰無
兵用何謀使縱遇凶年亦無災患

第四

問往年粟一斛估錢四百猶貴近年粟一斛估錢五百尚賤往年帛一匹估錢五百猶貴近年帛一匹估錢二千尚賤今耕夫未盡織婦猶在何故往年耕織計時量力勞苦忘倦求免寒餒何故今日甘心寒餒惰游而已於戲曩時粟帛至賤衣食至易今日粟帛至貴衣食至難而人心勤惰如此其何故也試一商之欲聞其說

第五

問古人識貴精通學重兼博不有激發何以相求三禮何

篇可刪三傳何者可廢墨氏非樂其禮何以儒家委命此
言當乎彼天女天孫不知何物彼日兄月姊弟妹是誰駟
僧與傖奴寧分一純將二精何說孤竹之君何姓新城老
婦何名棘竹出自何方毒銅產於何國何鄉無水可飲何
地卧冰而溫何人恩信過於田橫何人壯勇等於關羽何
人鑿坯而遁何人終日掃門無淺近之不爲悉說

賀廣德二年大赦表

臣某言臣伏奉某月日赦某月日宣示百姓訖伏惟皇帝
陛下以慈惠馭兆庶以謙讓化天下凡所赦宥皆允人望

凡所敦勸皆合大經生識之類不勝大幸臣方領陛下州縣守陛下符節不得稱慶下位蹈舞闕庭不任歡戀之至謹遣某官奉表陳賀以聞

賀永泰改元大赦表

臣某言某月日恩赦到州宣示百姓訖百姓貧弱者多勞苦日久忽蒙惠澤更相喜賀歡呼扑躍不自禁止伏惟皇帝陛下增修典禮宏正紀度勞謙慈惠與人更新此實興王之盛烈明聖之至德戴履天地誰不慶幸臣方鎮守州縣不得蹈舞闕庭無任歡欣之極謹奉表陳賀以聞

辭監察御史表

臣某言臣伏奉某月日勅除臣監察御史裏行依前充山南東道節度參謀忽承天澤不勝慶喜負荷恩任伏增憂懼臣在至德元年舉家逃難生幾於死出自賊庭遠如海濱敢望冠冕陛下過聽疑臣有才謀可用謂臣以忠正可嘉枉以公詔徵臣延問當時之事言未可取榮寵已殊事未可行授任過次其時以康元狡逆陛下憂勞臣亦不辭疲駑奉宣聖旨招集士卒師旅未成又逢張瑾姦凶再驚江漢臣恐陛下憂無制變遂曾表請用兵陛下嘉臣懇愚

頻降恩詔聖私殊甚特加超擢至今臣自布衣未踰數月
官忝風憲任兼戎旅今不勞兵革凶豎伏辜臣不可終以
無能苟安非望自姦臣逆命於今六年愧無寸能苟求祿
位分符佩印不知慚羞戮辱及之死將不悔陛下忍而從
者其可勝言臣才弱識下非智無謀循涯顧分實自知恥
臣老母多病又無弟兄漂流殊鄉孤弱相養伏願陛下矜
臣愚鈍不合齒於朝列念臣老母令臣得以奉養則聖朝
無辱官之士山澤有純孝之臣不任悃款之至謹遣某官
奉表以聞謹言

請節度使表

臣某言臣自以愚弱無堪遠跡江湖全身之外無所冀望
陛下過聽徵臣顧問今臣起家數月之內官忝臺省爾來
三歲無益効用愧恥之甚在臣無踰臣竊以荆南是國家
安危之地伏願陛下不輕易任人陛下若獨任武臣則州
縣不理若獨任文吏則戎事多闕自兵興以來今八年矣
使戰爭未息百姓勞弊多因任使不當致使敗亡伏惟陛
下審擇重臣卽日鎮撫全陛下上游之地救愚臣不逮之
急謹遣某官奉表以聞

乞免官歸養表

臣某言臣以爲才不稱任位過其量不自知分禍辱皆及臣才不如人量識褊僻踰越秩次忝辱衣冠人亦有慙臣自知愧臣少以愚弱不願爲吏書學自業老於儒家今迹在軍中日預戎事此過臣才分近於禍辱者矣臣常恐荒浪失於禮法自逸山澤預於生類今穢污臺省紊亂時憲此過臣才分近於禍辱者矣伏惟陛下察臣才分不令亂官則貪冒苟進之徒自臣知恥陛下若官不失人則天下自理故曰天下理亂繫之官人臣以爲官人之難無敢易

者陛下焉可易於臣哉臣無兄弟老母久病所願免官奉養生死願足上不敢污陛下朝列是臣之忠下不欲貽老母憂懼是臣之孝願全忠孝於今日免禍辱於將來伏惟陛下許臣免官許臣奉養在臣慶幸無以比喻謹遣某官奉表陳請以聞

讓容州表

臣結言臣伏奉今月二十二日勅授臣使持節都督容州諸軍事守容州刺史御史中丞充本管經畧守捉使四月十六日勅到二十一日發付本道行營臣實愚弱謬當寄

任奉詔之日不辭憂懼臣結中謝臣聞孝於家者忠於國以事君者無所隱臣有至切不敢不言臣實一身奉養老母醫藥飲食非臣不喜臣躔違離則憂悸成疾臣又多病近日加劇前在道州黽勉六歲實無政理多是假名頻請停官使司不許今臣所屬之州陷賊歲久頽城古木遠在炎荒管內諸州多未賓伏行營野次向十餘年在臣一身爲國展効死當不避敢憚艱危但以老母念臣疾疹日久時方大暑南逾火山舉家漂泊寄在湖上單車將命赴於賊庭臣將就路老母悲泣聞者悽愴臣心可知臣欲扶持

版輿南之合浦則老母氣力艱於遠行臣欲奮不顧家則
母子之情禽畜猶有臣欲久辭老母則又污辱名教臣欲
便不之官又恐稽違詔命在臣肝腸如煎如灼昔徐庶心
亂先主不逼令伯陳情晉武允許君臣國家萬代爲規伏
惟陛下以孝理萬姓慈育生類在臣情志實堪矜愍臣每
讀前史見吳起游宦噬臂不歸溫嶠奉使絕裾而去常恨
不逢斯人使之殊死臣所以冒犯聖旨乞停今授待罪私
門長得奉養供給并稅臣之懇願塵黷天威不勝惶恐

再讓容州表

草土臣結言伏奉四月十三日勅以臣前在容州殊有理
政使司乞留以遂人望起復臣守金吾衛將軍員外置同
正員兼御史中丞使持節都督容州諸軍事兼容州刺史
充本管經畧守捉使賜紫金魚袋忽奉恩詔心魂驚悸哀
慕悲感不任憂懼臣某中謝臣聞苟傷禮法妄蒙寄任古
人所畏臣敢不懼國家近年切惡薄俗文官憂免許終喪
制臣素非戰士曾忝臺省墨纓戎旅實傷禮法且容府陷
沒十二三年管內諸州多在賊境臣前行營日月甚淺宣
布聖澤遠人未知有何政能得在人口使司過聽誤有請

留遂令朝廷隳柶法禁至使愚弱穢污禮教臣實不敢踐
古人可畏之迹辱聖朝委任之命敢以死請乞追恩詔前
者陛下授臣容州臣正任道州刺史臣身病母老不敢辭
謝實爲道州地安數年祿養容州破陷不宜辭避臣以爲
安食其祿蹈危不免此乃人臣之節其時臣便奉表陳乞
以母老地遠請解職任陛下察臣懇至追臣入朝臣以爲
不貽憂歎榮及膝下人子之分不圖恩勅未到臣丁酷罰
哀號冤怨無所迨及今陛下又奪臣情禮授容州臣遂行
則亡母旅櫬歸葬無日几筵漂寄奠祀無主捧讀詔書不

勝悲懼臣舊患風疾近轉增劇荒忽迷忘不自知覺餘生
殘喘朝夕殞滅豈堪金革能伏叛人特乞聖慈允臣所請
收臣新授官誥令臣終喪制免生死羞愧是臣懇願臣今
寄住永州請刺史王庭璈爲臣進表陳乞以聞

謝上表

臣某言去年九月勅授道州刺史屬西戎侵軼至十二月
臣始於鄂州授勅牒卽日赴任臣州先被西原賊屠陷節
度使已差官攝刺史兼又聞奏臣在道路待恩命者三月
臣以五月二十二日到州上訖耆老見臣俯伏而泣官吏

見臣已無菜色城池井邑但生荒草登高極望不見人烟
嶺南數州與臣接近餘寇蟻聚尚未歸降臣見招輯流亡
率勸貧弱保守城邑畚種山林冀望秋後少可全活臣愚
以爲今日刺史若無武畧以制暴亂若無文才以救疲弊
若不清廉以身率下若不變通以救時須一州之人不叛
則亂將作矣豈止一州者乎臣料今日州縣堪征稅者無
幾已破敗者實多百姓戀墳墓者蓋少思流亡者乃衆則
刺史宜精選謹擇以委任之固不可拘限官次得之貨賄
出之權門者也凡授刺史特望陛下一年間其流亡歸復

幾何田疇墾闢幾何二年間畜養比初年幾倍可稅比初
年幾倍三年計其功過必行賞罰則人皆不敢冀望僥倖
苟有所求臣實孱弱辱陛下符節陛下必當謹擇臣固宜
廢歸山野供給井稅臣不任懇款之至謹遣某官奉表陳
謝以聞

再謝上表

臣某言某伏奉某月日勅再授臣道州刺史以某月日到
州上訖臣前日在官雖百姓不至流亡而歸復者十無一
二雖寇盜不犯邊鄙而不能兵救鄰州雖賦斂僅能供給

而有司不無罪狀雖人吏似從教令而風俗未能移易臣又多病不無假故水旱災沴每歲不免疾疫死傷臣州尤甚以臣自訟合抵刑憲聖朝寬貸猶宜奪官陛下過聽重有授任伏恐守廉讓者以臣爲苟安祿位抱公直者以臣爲內懷私僻有材識者辱臣於臺隸之下用刑法者罪臣於程式之中臣所以不敢卽日辭免待陛下按驗虛實然後歸罪有司今四方兵革未寧賦斂未息百姓流亡轉甚官吏侵剋日多實不合使凶庸貪猥之徒凡弱下愚之類以貨賄權勢而爲州縣長官伏望陛下特加察問舉其功

過必行賞罰以安蒼生誰不自私臣實不敢所言狂直朝夕待罪不任懇款之至謹遣某官奉表陳謝

爲董江夏自陳表

臣某言月日勅使某官某乙至賜臣制書示臣云云者臣伏見詔旨感深驚懼臣豈草木不知天心頃者潼關失守皇輿不安四方之人無所繫命及永王承制出鎮荆南婦人童子忻奉王教意其然者人未離心臣謂此時可奮臣節王初見臣謂臣可任遂授臣江夏郡太守近日王以寇盜侵逼總兵東下傍牒郡縣皆言巡撫今諸道節度以爲

王不奉詔兵臨郡縣疑王之議聞於朝廷臣則王所授官有兵防禦鄰郡竝邑疑臣順王旬日之間置身無地臣本受王之命爲王奉詔王所授臣之官爲臣許國忠正之分臣實未虧蒼黃之中死幾無所不圖今日得達聖聰臣今年將六十老母在堂縱未能奉義捐生則豈忍兩忘忠孝臣少以文學爲諸生所多中年自頤逸在山澤聖明無事甘爲外臣無何以鄙僻之故返爲人知遂汙官次以至今日臣又頃年貶謫罪未昭洗今所授官復超越班秩罷歸待罪是臣之分今陛下以王室艱難寄臣方面臣亦以忘

身許國誓於皇天伏惟陛下念臣懇至謹因勅使臣某官
奉表以聞

爲呂荆南謝病表

臣某言臣自去秋疾疹以至今日轉加羸弱庶事不理某
月日附某官口奏請替某月日又進狀陳情未蒙允許伏
增憂懼陛下應以臣久曾驅策未忍替臣臣實憂陛下方
隅切須鎮守臣不能起止四十餘日艱虞之際實慮變生
今淮西敗散唐鄧危急在臣病廢豈敢偷安伏望天恩卽
與臣替儻餘生尚在得至闕庭犬馬之心死生願畢不勝

懇款之至謹遣某官奉表陳乞以聞